



□ أين كان الله حين أعتديّ عليّ من أحد أقربائي؟

مقدمة :

نبدأ بسؤال حساس أشكر صاحب/صاحبة السؤال اللي بعته وقالت: أين كان الله حين أعتدي عليّ كطفلة أعتداء جنسي من أحد أقربائي ..؟؟

أشكرك على السؤال لأنه سؤال جريّ وسؤال حساس وقد يعبر عن معاناة آلاف من الشباب اللي في طفولتهم عدوا على خبرة سيئة ذي كده ... أنه يكونوا تعرضوا إلى أعتداء جسدي أو جنسي يعني أعتداء بالضرب أو أعتداء بالأغتصاب وأحياناً يكونوا أطفال مش فاهمين، بالذات لما بنتيجي من طرف من العيلة أو من الجيران أو من الأقارب بتجرح تماماً نقاوتهم كأطفال وبرانتهم وممكن تسبب رصيد ضخم من الخوف والقلق والكآبة وقد يستمر طول العمر.

السؤال مرتبط بسلسلتنا لأنه بيبدأ بكلمة ((أين كان الله ..؟؟)) – فين ربنا اللي بيحبنى .. وفين ربنا الطيب .. وفين ربنا الراعي الصالح .. وفين ربنا اللي مات علشاني وهو مامنش هذا الوحش الكاسر أنه يسئ إلى نقاوة وبراعة طفلة في المرحلة دي؟

سؤال صعب وسؤال يجعلنا نبكي خجلاً من الفساد اللي في الطبيعة البشرية بالذات لما إنسان يتعامل مع طفل أو طفلة بهذه الوحشية ويكون تربطه بها كمان صلة قرابة .. بداية بيورينا بشاعة الخطية والفساد اللي دخل الطبيعة الإنسانية.

أتكلم في شقين:

1 ربنا كان فين؟؟؟ ... سؤالك.

2 أعمل أياه والموضوع ده مش راضي يطلع من ذهني؟ يجوز أنت مسألتيش السؤال ده لكن أتجاسر وأدخل في الحل.

سؤال .. ربنا كان فين؟؟

سؤال الحقيقة صعب، لأنه ربنا كثيرا ما يصمت .. يصمت عن أمور تبدو أنها تتعارض تماماً مع إرادته .. فعلا فيه ظلم في الدنيا .. فيه قسوة .. فيه حروب .. فيه أذية .. فيه تعب للناس كثيرة أوى، لكن الله يُحب في صمته ... يعني إيه؟ ندى شوية أمثلة أولاً:

يوسف:

لما أخوات يوسف سخروا منه وقلعوه جلابيته ورموه في البير وفضلوا يضحكوا ... ما هو موقف مرعب أنه يحصل كده من أخواته، وبعد شوية يتباع للناس غريبة .. وهيسافر ومش عارف إيه اللي يحصل .. ومش هيشوف أبوه .. وأمه ماتت قبل كده ودول أخواته اللي المفروض يأمنوه من أي حد غريب ..

- إية المشاعر اللي عدت على يوسف؟ رعب وخوف وغضب فظيع ... كلكم عارفين بقية القصة.

أستمرت المأساة حوالي 20 سنة من عبودية في بيت فوطيفار إلى سجن وأذية ... لكن في النهاية الدنيا أختلفت خالص ... بقى رئيس مصر (رئيس الوزراء تقريبا) ومخلص العالم، ورجع لحضن أبوه وهو اللي عال أبوه وأخواته وهو اللي عرف يسامحهم .. هو اللي تخطى وجع السنين .. هو اللي وصل إلى قمة في القداسة والروعة والإنجاز وتشبهه بالمسيح ... وإن كانت حياته لا تخلو من مأساة ومأساة طويلة .. مأساة حقيقية ...

➤ كنت فين يارب لما كان يوسف بيعيط كل ليلة في قصر فوطيفار وهو واخد زاوية بيتحسر مش طايل أبوه ولا العز اللي كان فيه؟؟؟

➤ كنت فين لما الست أتهمته بتهمة وهو برئ وعشان خاطرك يارب حافظ على طهارته وأترمي في السجن وكان ممكن يتنسى خالص هناك؟

✓ ربنا كان موجود بس كان ساكت، لكن ساكت وهو بيدبر كل حاجة .. ساكت لأنه بيعمل حاجة لبكرة .. ساكت لأن فيه حاجة أهم هتحصل ..

تشبيه يقرب الفكرة

أتصورها ذي أب مدخل أبنة ل أيد جراح والجراح مثلا هيدي له حقتة، وبعدين يفضل الأب ساكت والولد الصغير يبص لأبوه لأنه ولد صغير أنت مش بتدافع عني ليه ..؟؟ ... الدكتور ده هيقطع مني حتة .. الدكتور ده بيوجعني .. دول بيمسكوا إيديا ورجلي .. أنت مش أبويا ولا أياه؟ فينك يا بابا ...

✓ هو بابا موجود وقلبه بيتقطع بس يبدو اللي بيحصل ده مهم أوي وضروري أوي ...

الطفل في اللحظة دي هو مش فاهم لأنه طفل، مش قادر يستوعب إن ممكن القسوة دي أو الوجع ده يكون مفيد ليه إزاي؟ هو شايفه ضرر .. لو بيتفتح له خراج .. ببوجع أه بس يمكن في يوم من الأيام يفهم إن الخراج ده كان هيعمل له تسمم في جسمه وكان هيموت، لكن فيه لحظات بيبقى صعب أوي أنه يفهم ويجوز يفضل يعاتب أبوه لسنين أو زعلان منه، أو الحتة دي قافلاه من ناحية أبوه كأنه: أنت سكت في وقت كان لازم تتكلم؟ ويكون سكوت ربنا عن قصد، وسكوت ربنا مش سلبية.

لو راجعنا تاريخ البشرية ... كثير ما هنسأل: أين كان الله؟

أين كان الله مثلا من قصة العبرانيين في أرض مصر

كانوا يومية بيتنلوا ويتجلدوا وأسمهم شعب الله المختار قبل موسى ... وكان يطلع قرار إعدام كل طفل ذكر، كام أم اتفطر قلبها على أبنها اللي أعدم وربنا ساكت ... أنت فين يارب؟ ... أومال أحنا بنقول: ((إله إبراهيم وإله إسحق وإله يعقوب)) بنقول أحنا شعبك، تسبب ولادنا يحصل لهم كده؟! ...!!

يوكابد أم موسى

واللحظة اللي أخذت يوكابد موسى وحطته في قفص أو سبت وبترميه في النيل ... كان أياه اللي جواها غير:

➤ أنت فين يارب .. ليه تخليني أحط أبني في المية وأنا عارفة أنه بعد دقائق ولا ساعات هيموت؟ أو هيغرق؟ وأنا شايفاه بيعيط ومش قادرة أحضنه ولا أرضعه تاني؟؟ ..

إحساس صعب أوي .. لكن لو أستمر في بيتها، مش هو بس اللي هيموت، كلهم هيموتوا، لأنه مايصحش كان يعيش ...

موسي بعد ساعات بسيطة رجع لحضنها تاني ... ويبدو أن الصرخات اللي كانت جواها دي ربنا سمعها بسرعة جداً ... لأنه بساذجة مريم أخت موسي جريت علي الأميرة تقولها أجيبلك واحدة ترضعه؟ وجابت أم موسي ترضعه ..

دانيال والثلاث فتية والسبي

فينك يارب لما أخذ أفضل شباب شعبك، واحد زي دانيال والتلات فتية سبايا؟ إحساس مُر .. أهاليهم اللي شايفينهم مسحوبين كده ومش هيشوفوهم تاني وعيال حلوين زي الفل، بيحبوا ربنا جداً وملتزمين بالشرعية أكثر من أي شباب في اليهود بيتفصلوا عن أهاليهم وبيروحوا آخر الدنيا ومفيش مجال أنهم يرجعوا تاني ولا يشوفوا بلادهم وهموتوا في البلاد دي ويعيشوا عيشة في الأول مرة كأنهم بيُفرض عليهم الوثنية!!

➤ فينك يارب؟ تحصل لواحد زي دانيال وهو إنسان تقي بتاع صوم وصلاة؟! .. تحصل لثلاثة فتية رجالة معاك وبيحبوك؟! ليه يتدلوا الذل ده كله؟!!!

أنواع من المآسي والأحزان في الكتاب المقدس وفي تاريخ الكنيسة وفي تاريخ البشرية ... تخلي الواحد يحق له يقول: أنت فين يارب؟!!!

لكن إجابة أنت فين يارب ... مش لازم تتحل بسرعة ... الحقيقة ربنا يظهر بعد سنين أو يتكلم بعد سنين طويلة أوي ويثبت لكل شخص أنا كنت جنبك وكنت سامع صراخك وكنت حاسس بيك وكان قلبي بيتقطع معاك، بس كان ضروري منه ده ... طيب ضروري ليه؟؟

في قصة زي بتاعتنا دي، إيه يارب الضروري في الموضوع إني أنا أتبهدل في طفولتي وأعدي على خبرة سينة تخليني مش قادر أحب نفسي؟ .. مش مسامح نفسي؟ .. مش مسامح الناس؟ .. مش عارف أحبك وآمن ليك بعد اللي سمحت بيه؟... يمكن معرفش أتجوز من الخوف والرعب .. أيه الضروري في قصة زي كده؟؟

السؤال مازال صعب لأنه أحيانا أحنا ما بنبقاش قادرين نوصل لفكر ربنا، ودي حقيقة كتابية:

يَا لَعْمَقِ غَنَى اللَّهِ وَحِكْمَتِهِ وَعِلْمِهِ! مَا أَبْعَدَ أَحْكَامُهُ عَنِ الْفَحْصِ وَطَرُقَهُ عَنِ الْاسْتِقْصَاءِ! (روا 11 :

(33)

لأنه ممكن اللي يكون ربنا شايفه ومرتبته أبعد كتير أوي عن حساباتنا وتفكيرنا.... كلنا عاوزين نعيش طفولة بريئة وشباب جميل ونجح ونكسب، لكن الحياة السهلة دي أكثر من عاشوها هلكوا ... أكثر من كانت حياتهم بلا ضيقات أكثرهم لم يصل إلى السماء ويرضه دي ممكن تدخلنا في سؤال تاني في حلقة تانية ... طب برضه ربنا سايبهم يعيشوا من غير ضيقات ليه؟

لكن الطريق الضيق .. الوجع، والطريق الكرب اللي فيه أحزان كثيرة، هو طريق الملكوت ..

بنت ذي كده إتهانت في طفولتها إهانة صعبة وتعرضت إلى الرعب والخوف وعدم الأمان بكل صورته ...

بعض الردود على سؤال ليه

1 ممكن يكون ده المصدر الوحيد أو الدافع الأساسي في حياتها للجوء إلى الله ..

عكس اللي كنا بنقوله، ... صحيح بيحصل كتير مع الأطفال دول في شبابهم رفض لله بسبب الخبرة السيئة دي، لكن كتير منهم بيحتمى بربنا وبيمسك فيه زي العيل اللي خايف طول عمره ويبقا متشعلق فيه جامد أوي، وده الطريق الوحيد اللي يدخل به السماء.

إذا كنا شوفنا بعض الحالات اللي فضلوا فترة رافضين ربنا ... شوفنا حالات بالأكثر أحتموا في ربنا من قسوة الناس ومايقوش بيدوروا على حب بشر ولا يآمنوا لبشر .. الأمان والحب كله في ربنا، ودي رسالة مهمة ودا طريق خلاصهم.

2 يجوز القسوة اللي حصلت تجعل مثل هذه الطفلة لما تكبر أم مثالية

وأنا شفت ده في حياة ناس كتير، أم عظيمة لأنها مراقبة عيالها وخايفة عليهم وعارفة الشر وشافته قبل كده، وبتربي أحسن تربية في الدنيا، والجرح القديم أتم .. صحيح سايب أثر لكن خلاص النهاردة تركيزها كلها على أولادها وبتطلعهم أفضل ما يمكن يجوز لو مكانتش عدت على الخبرة دي، كان ولادها أتبهدلوا بهدلة أكثر.

مش لازم بس كأم ممكن تبقى خادمة، وخادمة لحالات شبيهة من حالتها وتعرف تصبرهم وتداويهم وتطيب خاطرهم، ويبقى لسان حالها من غير ما تقول: أنا عارفة أنتوا حاسين بأية، أنا عدت بده.

ربنا يسوع وماعناه من آلام نفسية وجسدية

لأن ده ينبهنا لحاجة تاني، ربنا يسوع لما جه الدنيا مجاوبش بشكل صريح: ليه بتحصل كل المآسي دي؟ بس دخل على أكبر مأساة في تاريخ البشرية وقال: أهو أنا قصادكم هأحط نفسي في أيدين ناس متوحشة مفترية، هشوف الظلم .. هشوف العري .. هشوف التهم الباطلة .. هشوف الضرب .. هشوف الجلد .. هشوف الموت البطئ .. ها أحتمل آلام نفسية وجسدية لا يحتملها أحد ... عشان لو مالاقيتوش إجابة عقلية على السؤال .. بصوا على الصليب ..

➤ عشان تعرفوا أن أنا اللي سمحتكم بيه سمحت لنفسي بيه وأكثر منه.

➤ وعشان إذا كان الصليب هو مفتاح الأبدية ... يبقى على الأقل تفهموا إن الصليب اللي عدى عليكم هو المفتاح الوحيد اللي هيدخلكم السما.

3 جزء آخر من إجابة هذا السؤال (طعم الراحة بعد التعب/التعويض):

أنه ممكن تعوض هذة الفتاة أو الطفلة دي لما تكبر بتعويض آخر من ربنا بمعنى أيه؟؟ هي إتصدمت في ناس قريبة ليها، لكن ربنا يجيب في يوم من الأيام أب أعراف أو زوج مثالي وهنا يقدموا لها حب نقي وأمان إفتقدته وهي طفلة، وتعيش خبرة جميلة تنسيها أحزانها ... وتقول في بالها: وماله يارب أنا عدت على فترة صعبة لكن في الآخر ذقت فترة جميلة أوي، فممكن يحصل التصليح ده والتعديل ده،

هتقولوا طب ما مكنتش المشكلة من أولها ليها لزوم!

➤ لا .. ساعات الراحة بعد التعب يبقى لها طعم أجمل من راحة بدون تعب ... حتى الراحة مش هيبقالها معني، الشفاء بعد المرض له طعم غير خالص لو مكنتش فيه مرض.

4 حقيقة أخرى (الترقية الروحية):

ربنا عاوز يرقينا روحياً، كلمة قالها المسيح: الجسد لا يفيد شيئاً ... يعني حتى لو أهينا في أجسادنا .. هي الأجساد دي أولها تراب وآخرها تراب، يعني مش ده القضية، هي الروحيات هي الأعلى.

- فكرة الغفران أو تحدي الغفران:

هيتعلمه الإنسان إزاي لو ما إتظلمش أو إتأذي؟ ما هو ده تحدي صعب .. لكن الغفران يقربك من ربنا ويديك غفران أبدي .. ماهو فين إمتحان الغفران لو ما عديتش عليك أي خبرات سيئة؟!

- فضيلة ذي الصبر:

هتكتسبها إزاي إذا كانت الحياة كلها ماشية كما تريدها؟! لكن الحياة اللي فيها احداث بتوجع .. فيها دموع .. فيها مخاوف، هي دي اللي بتطلع صبر ... وبصبركم تفتنون أنفسكم.

" بِصَبْرِكُمْ أَفْتَنُوا أَنْفُسَكُمْ " (لو 21 : 19)

- حُب الناس أو الإحساس بالآخرين:

مثل هذة الخبرة السيئة بتخلي أصحابها حنينين جداً على الناس، لأن هما أكثر ناس عارفين يعني إيه وجع القلب والدموع والخوف ... فيه ناس تانية تلاقي قلبها جاف، تسمع قصص ذي كده وتقول: ايه يعني؟ حصل أيه يعني؟ عيال وخلص!!

القلب الجاف ده معناه ماداقش .. مشافش المر .. ماشربش من الكأس، إنما اللي شرب من الكأس المرة، قلبه بيوسع جداً لدرجة بعض الناس اللي تعرضوا لخبرة سيئة ذي كده، كرسوا حياتهم لخدمة الطفولة أو الدفاع عن حقوق الأطفال، أو

علاج العشوائيات اللي بيحصل فيها حاجات زي كده، أو وعي للأسر المسيحية والأسر عموماً من الخطايا والخطبة اللي ذي كده، وأصبحت دي قضية حياتهم .. ليه؟ عشان يحموا آلاف الأطفال من المشاكل اللي من النوع ده.

** انا مازلت معنديش إجابة كاملة ودقيقة للسؤال اللي حضرتك باعتاه: هو ربنا كان فين لما حصل كده؟

بس اللي أنا أقدر أقولهوك بايمان هو:

ربنا كان جنبك وكان حاسس بيكي وكان ماسك أيدك وكان بيعيط معاك لکن كل ده عشان يدخلك السما في الآخر،

ولما توصلي السما ... هتشكري ربنا على هذه الخبرة السيئة،

وهتقوليله: يمكن من غير الظلم ده أنا مكنتش وصلت، ومن غير البهدة دي يمكن حياتي كانت مشيت في سكة تانية.

ف أنا معنديش إجابة دقيقة لأنني أنا مقدرش أعرف حكمة ربنا في كل اللي هيحصل في حياتك بعد كده.

أدخل في الشق الثاني من السؤال وأقولك رسائل مهمة ..

1 أنت بريئة:

أنت بريئة فأرجوكي ما تستسلميش لإحساس الذنب، لأن عدو الخير يلعب لعبة خبيثة جداً هنا .. تبقى طفلة بريئة أهينت وتفضل عايشة بإحساس ذنب غريب جداً، كأنها هي اللي مجرمة، في الحقيقة هي مش مجرمة هي ضحية، وفيه طرف آخر مجرم .. ولو ما تابش حسابه عسير جداً ...

إنما يتربي جواها إحساس رعب وخوف كأنها هي اللي أجمت، والإحساس ده يخليها مش عارفة تسامح نفسها مع أنها مغلطتش، والإحساس الوهمي ده أحياناً يخلي البنات دول يتعالجوا من قلق أو أكتئاب لسنين طويلة، وأحياناً يتضاعف الإحساس أنها هتكون فاشلة طول حياتها في الوقت اللي ممكن تكون ناجحة جداً.

أول رسالة: أنت بريئة .. أنت مغلطتش، وحتى لو غطتي بسبب خوفك من الخبرة دي، يعني بإرادتك في مرحلة أخرى غطتي ... فربنا بيحبك جداً ومستعد يسامحك أوي، ماتقديش تفكري في الخبرات السيئة .. ماتسترجعش الأحزان .. تذكر الشر الملبس الموت ... أجمري على ربنا يداوي ده كله وابتدي حياة جديدة.

المرأة التي أخذت في ذات الفعل

بعض الناس اللي وصلوا لمرحلة إحتراف الزنا، بتكون البداية خبرة سيئة للأسف .. فيجوز الناس ماسكين لها الطوب وهيرجموها وهي ماتقدرش تنطق بس اللي بيدور جواها إحساس: صدقوني أنا مظلومة .. أنا اللي وصلني لكده واحد تاني كان المفروض تحاسبوه ... أبويا ولا خالي ولا عمي ولا جاري .. هو اللي أبتدي معايا اللخبطة.

هي مش قادرة تصرخ وتقول: أنتم كلكم ظالمين .. أنا صحيح وحشة وغلطانة، لكن القصة ما أبتديتش كده؛ يجوز السامرية عاوزة تقول كده، كتير من اللي وصلوا إلي درجات من الإنحراف، البداية مكنتش رغبة في الشر أصيلة .. يمكن كانت معرفة للشر مبكرة وصدمة فظيعة لخبطتهم.

ومن هنا بنشوف أد إيه المسيح بيحترم الناس دول وبيقدرهم جداً وبيتعامل معاهم بحب ويشفق عليهم؛ في الوقت اللي الدنيا لا تشفق على أحد .. بيكون حنين جداً عليهم لغاية ما يديهم ثقة في نفسهم ... أنتم مقبولين عندي .. أنتم ممكن تبقوا قديسات، واللي فات ده أنتهي ونبتدي صفحة جديدة وكأنها عُمر جديد وحياة جديدة تبقوا أحسن من أي حد.

ف أول رسالة تاني بأقولها لك:

إنسي .. سامحي نفسك .. إقبلي الغفران من ربنا يسوع .. دافعي عن نفسك قدام نفسك إنك بريئة في مواقف كثيرة أوي

2 أب الاعتراف

لازم يكون ليكي أب أعتراف .. إختاري أب حنين يتشبه بالمسيح عشان يبصلك بإحترام وعشان يطيب خاطرک ويقولك: مغفورة لك خطاياك، ويقولك: إيمانك خلصك، ويقولك: أنت بتحبي ربنا أكثر من ناس كثيرة أوي،

المرأة اللي بكت على رجلين المسيح

المسيح قال لها على فكرة أنت أحسن من سمعان الفريسي .. أهو رجل متدين بيصوم ويصلي وعامل نفسه ما بيغلطش بس أنت عندي أحسن منه.

أنت محتاجة أب إعتراف يبقالك أب يشيل معاكهم الهمة ده ويساعدك تقبلي نفسك وترجعي تفرحي بربنا وتفرحي بحياتك.

3 أخرجي بره نفسك لدائرة الحب والعطاء

بمعني؛ أخطر حاجة بتحصل للولاد والبنات دول إنه طول الوقت بيفكر في نفسه بطريقة أو بأخري، يعني يا إما متغاضب من نفسه .. يا إما عاوز ينتقم لنفسه .. يا إما كاره نفسه .. يا إما بيحب نفسه زيادة ومش عاوز يتعبها

خالص، المهم أنه بسبب الصدمة دي بيتحوصل جوه نفسه، وده بيزيد قلقه ورعبه وخوفه وتعبه النفسي وكآبته ورفضه لربنا أحياناً.

لو عرفتي تطلعي لدائرة الحب للناس والعطاء .. خدمة أطفال .. خدمة ملاجئ .. خدمة مسنين .. خدمة مرضى ... لما تدي هتلاقي نفسك خفيتي لوحك، والموضوع ده أتبخر من دماغك، وأصبح كأنه كابوس عدى عليك في ليلة وكأنه لم يحدث، وهتلاقي نفسك بتدوري هو أنا مش تعبانة ليه؟ لأن الحب هنا يشفي اللي بيحب أكثر ما يشفي المحبوب ...

الخدمة هنا حل، وحل جذري لمعاناتك، لأنك لما تهتمي بأخرين، هتلاقي مش أنت وحدك اللي متألّمة، وإذا كنتي فاكرة أن الهم ده والوجع ده هو أصعب هم، لأ .. فيه هموم كتير أوي، وفيه أوجاع أشكال وألوان ... والفقر متعب والمرض متعب والظلم متعب وفيه حاجات كتيرة يمكن ما عدتش عليك تصل إلي نفس القسوة أو أكثر.

وفي الآخر إله المحبة حاسس بيكي وديريان بيكي وهيغرقك حُب وهيشبك وهيغوضك بس أنت دوري عليه.

4 رسالة للمجتمع:

أحذروا على أطفالكم من المتوحشين اللي حوالينا، للأسف فيه آباء وأمّهات معندهم مش أدنى حكمة، وماعندهم مش وعي، ويمكن ما يستاهلوش يبقوا آباء وأمّهات، لأنه إذا ماكاتوش عينهم مفتوحة ومسئولين عن ولادهم ويأمنوهم، يبقى الحقيقة ميستاهلوش لقب الأب ولا لقب الأم، لأنه ما أكثر المآسي اللي بتحصل بسبب جهل وعدم وعي الأب والأم.

فيه أمّهات بتسيب عيالها بدون أي رقابة وبدون أي ضابط، وتطلع الطفلة دي أو الشابة دي مش عارفة تحب أمها، لأنها مش مسامحاها، لأنه هي كان لازم يبقى لها دور في الدفاع وما عملتش الدور ... أو الأب كان لازم يبقى له دور في الحماية وما عملش الدور ده ...

أرجوكم حاسبوا على أولادكم لأن أولادكم دول ثمرة وعطية من ربنا غالبية أوي، والسنوات الأولى بالذات من العمر هي اللي بتشكل أكثر نفسية ولادنا الشباب كرجال وستات بعد كده، أول كام سنة أخطر كام سنة في تشكيل وتكوين الشخص بنفسيته وبميوله وأفكاره وبمبادئه وبالتالي لازم تكون عينينا مفتوحة.

الإعتداء اللفظي

الإعتداء ليس فقط إعتداء جسدي أو جنسي، ساعات بيكون إعتداء لفظي ... يعني أيه؟

كان فيه سؤال شبه كده: كان فين ربنا وأنا بتشتم كل يوم في بيتي لما كرهت العيشة وكرهت أهلي وكرهت ربنا ???

سؤال مقارب لأنه أحيانا يكون الإعتداء اللفظي لا يقل قسوة عن الإعتداء الجسدي ... لما ينتقال لطفل أو شاب: أنت فاشل .. أنت مابتفهمش، هو اللي بيحصل جواه انه بيبتدي يقتنع باللي ينتقال له، ف بيعيش فاشل لأنه إنتقال له كده من بدري ... أو بيعند مع والديه أو اللي بيقولوله كده، ف بيقول طب أنا هاوريكم الفشل!! ... أو أنت غبي، ف أنا هوريكم الغباء!!

طبعا ده أسلوب تربوي فاشل، لأنه الحقيقة ولادنا دول أعلى حاجة عندنا، والتشجيع هو أفضل طريقة للنمو، أفضل طريقة لوضع الثقة في نفوس أولادنا، أفضل طريقة للتواصل ... التشجيع المستمر، أحنا يا كبار بنحتاج تشجيع، بالكم بالطفل الصغير أو الشاب اللي لسة طالع للدنيا!!

- إذا الإهانات اللفظية هي أيضا لا تقل بشاعة عن الإهانات الجسدية أحيانا.

- نرجع للسؤال ((هو فين ربنا ..؟؟)) ...

وهو ربنا ما إتهانش؟! .. دا ربنا إتشتم أكثر من أي حد!!! أيه رأيكم إن ربنا يسوع قيل عنه في وقت: انه ابن خطية!! تصوروا المسيح له المجد إنتقال عليه كده!!! كان ساعات ينتقال عليه: ابن النجار!! كأنه مايفهمش!! ... قيل عليه من أهل بيته: مختل العقل!!! طبعا قيل عليه مجدف ويدعي أنه ابن الله، قيل عليه أنه عدو قيصر... ياما المسيح أتهم باطل وإتشتم وإتهان وإتقال عليه انه شيطان وإتقال عليه أنه سامري ...

إذا كل من يجد معاناة داخلية لازم يبص على ربنا يسوع لأنه:

"لأنه في ما هو قد تآلم مجرباً يقدر أن يعين المجربين." (عب 2 : 18)

وشطارة أي خادم أنه يحط المسيح في حياة الناس دول، لأن ربنا هو الوحيد اللي يعرف يصلح عياله .. كلمة يمسخ الله كل دمعة .. يعني ..

ربنا اللي سمحك بدموع هيعرف يمسخ دموعك ...

ربنا اللي شد عليك في وقت من أجل خلاصك .. هيعرف ياخدك في حضنه برضه من أجل خلاصك ..

داود النبي كان بيعامل كأنه نكرة في بيته، قالوا له الصغير مع الغنم .. كان لا قيمة له!! إنما داود هو اللي قال:

"أَعْظَمَكَ يَا رَبُّ لَأَنَّكَ نَشَلْتَنِي وَلَمْ تُشْمِتْ بِي أَعْدَائِي." (مز 30 : 1)

عرف يخف من إحساس الدونية أو إحساس النكرة، لأنه شبع بربنا وحبيب ربنا، ثقته في ربنا خلته واثق في نفسه ووقف لجليات ووصل أنه يبقى ملك اسرائيل وحتى بعد ما سقط ووقع في خطايا كبيرة، بالثقة اللي في ربنا رجع تاني بالتوبة وبقا قديس عظيم أوي ...

خاتمة

بنتي الغالية مفيش حاجة أقولهاك غير: ربنا قادر يفرحك ويشجعك تطلعي من اللي أنت فيه ... وأوصيكي تاني روي لأب
أعتراف ... إرجعي صلي ... قولي له: يارب أنا مش فاهماك وحتى لو زعلانة منك محدش هيصالحني عليك غيرك، وانت
اللي قادر تعوضني عن اللي حصل وتشبعني بيك عشان ما أحتاجش حد غلط، وفي نفس الوقت أتمنالك مستقبل حلو وخدمة
حلوة وتوصلي السما بالآلام اللي عدت عليكي ..

+إلهنا كل مجد وكرامة إلى الأبد آمين+

Anba Abraam Media

الخدمة محتاجة الكل و الكل محتاج الخدمة